

## NDINAM N̄WA-IDEM NNỌ JESUS

Matthew 16:24-27; Luke 14:33; N̄wed Mbon Philippi 3:8; N̄wed Mbon Rome 15:1-3

### QYQHỌ UKPEP-N̄KPỌ 469

Eke M̄kparawa

**IKỌ IBUOT: “Koro Christ n̄ko ikenemke idem esit” (N̄wed Mbon Rome 15:3).**

#### Utom Ima

Nnyin imokot ke N̄wed Abasi ibańa ediwak owo emi ekenamde ikpọ n̄wa-idem man ekpenam utom enọ Qbọń. Mmọ ema “esin” ediwak inemesit ye inem, ke ntak emi mmọ ekemade Abasi ekenyuń eyomde ndinem Enye esit. Ndusuk mme ido ukpono ebiọńọ ikọt mmọ ndidia ndusuk oruk udia, mme owo enyuń ekere ete mmimọ imekeme ndinem Abasi esit ke ido emi, edi Qbọń ikopke inemesit ke oruk edinam emi. Owo ikemeke ndibọ mfọn Abasi nto ke ndinam ntre, mme ndinyik Abasi man ọnọ enye akwa utip ke ntak eke owo oro ọtuhọrede idemesie.

#### Nsu-nsu Ido Ukpono

Ke isua ifań emi ebede, ke ini isuń-utom Abasi nnyin kiet okodude ke Mexico, enye ama okut mme ubuene iban India emi edọńode nte mmọ edade edọń esańa ke mkpoho itiat ebe ke ini mmọ ekperede iso ndem N̄wan emi mifiọkke erenowo Guadeloupe. Mmọ ekedori enyin ndibọ mfọn nto N̄wan emi mifiọkke erenowo oro nnyuń mbọ erikọk ke mme udọńọ mmọ, edi emi ikańwamke mmọ baba.

Nnyin imokot ibańa mme okpono-ndem ke mme esen-idut emi esimende nsek nditọ mmọ eduọńọ ke Inyań Nile enọ mme ofiom eta, man oto do mmọ ekpebọ mfọn eto mme abasi emi mikoduhodu. Edi kpukpru mme n̄kpọ emi edi se minemke ata Abasi akpanikọ esit. Enye osuk enyin ese mme oruk owo emi onyuń odomo ndiwut mmọ nte ke Imọ iyom mmọ ekpono Imọ ke spirit ye ke akpanikọ, oto ke esit.

#### Edituk Idem

Ndusuk ini nnyin imesikop nte edọhọde ete ke ima inyeneke adańa ke ndinam utom ke otu ikọt esie. Didie ke ikọ emi edi ata akpanikọ! Eka eyesọsọp edemere ke okoneyo ke ini eyen esie atuade, enye idibiatke ini ndidaha ke enyọń nnam n̄kpọ nnọ enye; ke ofuri usen, eka akpa utom ndinam udia nnọ ebe ye nditọ esie; enyene ndibri mme bed, ọkpọri isọń, eyet onyuń ọkwọhọre mme ọfọń onyuń anam mme utom eken. Ete eyebak edemere onyuń anam utom ofuri usen, ikereke edim mme eyo. Ediwak mme ete ye mme eka ema nditọ mmọ, ndien enam utom mmọ inyuń inọhọ mfańa.

Iren ye iban, m̄kparawa iren ye iban emi ema ekenyańa, emeyak esit ye uwem mmọ enọ Jesus. Edi akpanikọ, mmọ enyene mme utom ndinam ke ufọk, ke itie utom, mme ke ufọk-n̄wed. Edi ama mmọ etim etiń enyin ke mme n̄kpọ Abasi ekan mme n̄kpọ uwem emi. Mmọ enyene ndibeńe idem ndikpọńode mme n̄kpọ eke midighe akpan mbubehe nnim man oto do ekeme ndinem Qbọń esit, enyuń enyene anyan ini ndinam utom Qbọń.

Paul ama ewet ọnọ mbon Rome onyuń etiń ọnọ mmọ ete yak mme owo emi ekopde idem ke spirit ebiom mbon mmem-idem, oro edi, mmọ eke ebọde edinyańa obufa, mme anditiene-Christ emi minyeneke iwuk; enye ama ọdọhọ ete ke mme owo ikpanaha edomo ndinem idem mmọ esit, “koro Christ n̄ko ikenemke idem Esie esit.”

Jesus ama ọdọhọ ete: “Edieke owo ekededi oyomde nditiene Mi, yak enye otuk idem esie, onyuń emen krọs esie, etiene Mi. Koro owo ekededi eke ediyomde ndinyańa uwem esie eyeduok enye, edi owo ekededi eke ediduokde uwem esie kabańa Mi eyeda uwem esie enyene.” Yak nnyin idomo ndikpep se ndituk idem nnyin nnyuń mmen krọs nnyin ntiene Jesus ọwọrọde. Mfin, uwem akama ediwak nsio-nsio n̄kpọ inemesit ye uwak mbubehe emi ekemede ndida ini owo, ọtọńode ke usenubok emi owo edemerede tutu osim ini emi edukde idap. Ekeme ndidi ke ndusuk mme n̄kpọ emi idighe idiok-n̄kpọ, edi ke ini nnyin iyararede ifiok ite ke ini ọmuhọ, ndien ke Jesus ekeme ndidi ini kiet ekededi, nnyin imọfiok ite ke ini edi emi ọnọ mme Anditiene-Christ nditim nsin ifik ke utom Qbọń. Nnyin imesikut ewetde ete: “Uwem kiet kpọt, ibighike eyebe; edi se enamde enọ Christ ikpọń-ikpọń edibighi.”

## Nti Uwut-ńkpọ Mbon Abasi

Yak nnyin iduńọre uwem ndusuk ikọt Abasi emi ekeyakde idem, ekenyuń edude uwem ntuk-idem, emi ekenemde Abasi esit minyuń isańake nte mme udọń idem mmọ edide. Paul edi kiet ke otu mmọ oro “ekebatde uwem mmọ ke ekpri ńkpọ kabańa enyiń Qbọń nnyin Jesus Christ” (Utom Mme Apostle 15:26). Enye ikonyuń ibatke uwem esie ke ńkpọ, edi ama ayak ofuri-ofuri ọnọ Jesus. Paul ama etiń abańa nte ekedade eto emia enye, eketońode enye ke itiat, ubom esie okosipde, nte ekewotde enye; enye okonyuń okopde ubiak, mmemidem, biọń, nsat-itọń, tuep, onyuń ananade edisine-ńkpọ. Nko, enye ama ada mbiomo nditọ Abasi obiome ke esit esie, etre udia onyuń qbọń akam abańa mmọ. Enye ama etiń ke ọyọhọ idaresit ete ke iyeda se inyenede inam ńkpọ inọ nditọ Abasi, enye ama onyuń ekpep ndinyene uyuhọ ke enyenede esisit mme ediwak ńkpọ.

David nko ama otuk idemesie ke ediwak ńkpọ man ekeme ndinem Abasi esit. Ini kiet ke enye ama okokure ndińwana ekọń, onyuń okopde ata ọkpọsọń nsat-itọń, mbon ekọń esie iba ema ebat uwem mmọ ke ekpri ńkpọ man ekeda mbit-mbit mmọń edisọk David ọńwọń. Edi ke ini mmọ edade mmọń edisọk David, enye ama esin ndińwọń koro mme owo oro ekesinde uwem mmọ ke ńkpọ-ndik ke ndika ńkada mmọń ndi, ndien David ọduok mmọń nte uwa ọnọ Qbọń.

Moses ama esin inyene Egypt, “sia enye emekde ndibiom ukut ye ikọt Abasi, akan ndidia inemesit idiok-ńkpọ ke ekpri ini” (Mme Hebrew 11:25).

Abraham edi kiet ke otu mbon uko ke mbuotidem emi okodude uwem ntuk-idem, onyuń oduń ke mme ufok-ọfọń nte ododuń ye asańa-isań ke isọń, “Koro enye odoride enyin ke Obio eke enyenede nsọńo-nda, eke Andibọp ye Andinam Enye edi Abasi” (Mme Hebrew 11:10). Ke adańemi akakan idomo ekedide, Abraham ikabiatke ini ndinam uyo Abasi, nnyuń nwa ńkukure eyen esie Isaac. Abraham ama onim ke akpanikọ ete ke Abasi ama ekeme ndinam enye ọtọńo ntak odu uwem, ekpededi nte enye ama akpa. Ke ini ekemenere ofut esie ndiwot eyen esie, angel Abasi ama ọbiọńo enye onyuń ọdọhọ enye ete okunam ntre, koro kemi Abasi ọmọfiok ete ke Abraham eteńe onyuń ama Imọ. Okukim ama odu emi nnuk esie ọkọkọmọde ke mfuho ikọt, ndien Abraham ama akabare ada enye ọnọ ke edifọp uwa ke ibuot eyen esie.

## Utom Emi Otode Esit

Mmọ emi ye ediwak eken ke Ikọ Abasi edi mme uwut-ńkpọ uwa, nyak-idem ye ntuk-idem. Mfin, Abasi iyomke utọ akamba nwa-idem emi, enamde enyoń-enyoń, edi Enye ke anyan ubok oyom esit nnyin. Nte nnyin imonyime ndituk idem nnyin ke idem ńkpri ńkpọ, ke abańa Enye emi akayakde kpukpru ńkpọ ke ntak nnyin? Yak nnyin iduńọre idem nnyin.

Jesus ọkọdọhọ ete owo ekededi eke mikpọńke kpukpru se enye enyenede ikemeke ndidi mbet Imọ. Oro iwutke ete ke ana nnyin ikpọń ufok nnyin, edi owut ete ke ana nnyin imum kpukpru se Abasi ọnọde nnyin mfefere-mfefere inyuń ibeńe idem ndikpọń ńkpọ ekededi emi Abasi oyomde ikpọń. Enye ekeme ndidọń nnyin ika ikese mbon udọńo, mme ndikpep ikwọ man ikeme ndibre ke otu mbon ikwọ; Enye ekeme ndiyom nnyin inọ okuk man eda esuan Eti-mbuk; Enye ekeme ndiwut nnyin owo emi oyomde uńwam, nko, Enye ekeme ndiyom nnyin itotim iyak ini nnyin inọ edibọń akam ke ńkpọ-itie eseme, ye edikpep Nwed Abasi.

Nnyin imekeme ndinana mme ńkpọ uwem emi, edi oro idighe akpan ńkpọ. Nnyin imekeme ndise mkparawa iren ye iban emi etiede nte mmọ enyene ediwak okuk ndibiat ke mme ńkpọ inemesit ye ọfọń. Nso iditibe edieke nnyin inanade ńkpri ńkpọ, se idide akpan ńkpọ edi ndikop uyo Andifak nnyin, nnyuń mbeńe idem ndisobo ye Jesus ke ini Enye edidide, nnyuń nńwam mmọ efen ndikut Enye nko.

Eda ńkop-uyo ye utom edinyime esit emi inamde inọ Abasi edomo ima emi nnyin imade Enye. Yak nnyin ibup idem nnyin mme nnyin imema Enye ikem ndikań idem nnyin nnyuń nnam mme uwa man ikeme nditetim nnam ńkpọ Esie nkan. Edieke nnyin inyenede ata ima ye mfọn Abasi ke esit nnyin, nnyin iyenam ke ofuri esit ye ke inemesit se ededi eke Enye ọdọhọde nnyin inam.

## MME MBUME

- 1 Nso idi ntuk-idem?
- 2 Siak ndusuk mme ńkpọ emi nnyin ikemedede ndikpọń ke ntak Jesus.
- 3 Nọ uwut-ńkpọ ke abańa owo ita emi ekenamde ikpọ nwa-idem enọ Abasi.
- 4 Nso idi utip nti mme anditiene-Christ emi edude uwem ntuk-idem?

- 5 Nte owo ekededi ekeme ndibọ mfọn Abasi oto ke enye ndinọ idem esie ufen?
- 6 Nso ke nnyin ikeme ndinam man nnyin inyene edidiọn Abasi?
- 7 Nso nkpo inyik anditiene-Christ ndinam utom nnọ Jesus?
- 8 Nte edi ọkpọsọn nkpo anditiene-Christ ndinam uyo Jesus?
- 9 Nso utọ utom ke ata anditiene-Christ ekeme ndinam nnọ Abasi?